



Spezi Clique 1905 Stamm

Fasnacht 2016

Me(e)r versuffe in unserem Blastigghuffe !

Uss Pflanzesäft und Birkerinde
dien d Neandertaler e Kautschuk erfinde
das erlicheret'ne s'Lääbe
zum ihri Wärggzyyg zämmez'glääbe...
duur d Joorhundert hett me das wältwytt entwigget
und in allne Laboor dra ummebigglet
hett e Kunststoff druss gmacht – zääch wie ne Moore
und esoo ungefäär – isch dr Blastigg geboore !
Zerscht gilt däm Kunststoff s volli Verdraue
und s hett nyt gää, wo d'nit kasch uss Blastigg baue
oder in Blastigg kasch go beschaue
alles wigglich in Blastigg y – nyt blybt mee blutt
denn Blastigg hebbt ewig und goot nit kaputt
hitt verpaggd me sogar vo Mändig bis Fryttig
scho jedes Heftli und bald jedi Zyttig
heerschafttyne, s isch zum Gryyne
in soone Blastiggfolie yyne
drby gheert das wo die schryybe doch unschiniert
nit no äxtra hermetisch blastifiziert
sondern ganz ohni Blastigg – grad kompostiert !
Aber zrugg zum Aafang – ai Froog gitt z'kaue
s'Dra Dängge hett aim woorschynts graue
wo wottsch's mit em Abfall aane haue ?
Die ich rief, die Blastigg-Gaischter
dääne wird me jetz nimm Maischter
me duet ganz aifach d Umwält versaue
und am Schluss denn dä Blastigg im Meer verstaue...
und will me s richtig Entsorge verduudlet
seesch immer mee Blastigg wo im Ozean struudlet
und d Konsequänz, die macht dy muff:
es schwemmt dä Drägg grad oobenuff
pro Quadratmeter zellt me hitt – gar nit gail
scho fascht zwanzigdausig Blastiggdail...
In däm wältwytt riisige Blastigghuffe
wärde mir, wenn's so wyter goot, versuffe...
Aber nit nur ins Meer, au by uns in Rhy
kheyt me scho zymmlig vyy! Blastigg dry...
und das hänn allwäg ainigi gmacht
dass – nit erscht syt geschter znacht
unsre Bach – wird jetz nit root !
punggto Blastiggmüll ganz oobe stoot
dr Rhy durab heerts s Puff nimm uff
findschs aber au dr Rhy duruff
scho uss em Rhyfall by Schaffhuuse
fischt me Blastigg-Kiigeli uuse
und by Chur – oh läng mer's Gweer
haigs schynts dervoo no viermool meer
wo däs häärkunnt, bitte seer
obwoll er gsait hett, är verglemms
kennt's sy, es käm vom Blocher z'Ems...
Im Rhy haigs, druurig, aber woor
zää Tonne Blastigg jedes Joor
wo aabeschwimmt – es isch dr Waan
zum Blastiggbärg – im Ozean
Zerscht sinns no Mini-Portioone
ganz glaini Blastiggratione
wo sich via Mutatioone
zue greessere Ratioone gloone
und denn in Abermillioone
scho fascht kai ainzigi Meereszoone
vor eme Blastiggbärg verschoone
Dert seet e Fisch e Plastiggugge
maint s'syg Plankton, duet sy verschlugge
und griegt dervo grad s letschti Zugge
Au jedi Schildgrott - me liists mit Inträsse
haig ab und zue scho Blastigg grässe
und Pinguin, die syge gopfergässe
statt uff eme Ysbärg – uff Blastigg gsässe...
Zäämool mee Kunststoff als nadyrligi Naarig
verhinderet au – dasch bsunders haarig
by gwysse Meeresdier scho d'Paarig
Ischs hitt none Viech, wo d Schruube macht
haisst's morn denn gly fyr uns: Guet Nacht
Vom Blastiggdärg – spyre mir no kai Drugg
dä kunnt denn durch d'Viecher im Aesse zrugg
duet me aifach wyter flenne
und d'Zyt au wyter no verpenne
no leert me s Ganzi jetze denne
als neye Naarigskraislauf kenne...
Dr Wind, dr Wind, das himmlisch Kind
dräit jedes Blastiggräschtl gschwind
ganz im Stille, s isch zum Griine
vom Meer ans Land, in d'Rohstoff yyne
s feen d Naarigsmittel afoo moodere
am Aafang blybts vylicht bym Koodere
denn kheysch langsam ab em Stängeli
und ändsch – als Blastigg-Aengeli
Zwoor kennt me jo Blastigg nomoll bruuche
in Abfall Lääbe yynehuuche
so wär jede Joggeli-Mehrwäägbächer
im Grund gnoo jo en ächte Brächer
aber uss em wältwyte Huffe – das isch s Haiggle
kenn me schynts nur e glaine Dail risaiggle...
fyr dr Räscht zrugg z'gwinne bruuchts Chemikalie
no waisch nie, gitt das wieder Fäkalie
und schlicht sich zwyschenyyne fiin
nit au no ne weeneli Dioxin...?
jä mir kenne sy jo nit, die Ketti
aber mit uns macht me sicher wieder dr Netti
denn e baar in unserer Menschehorde
sinn doch lengschters zue Abfallmonschter worde..
So isch bald fascht alles Menschewärgg
und dr Mensch stoot doo – wie ne Gartezwäärg
vor sym ybergrosse Blastiggbäärg
dasch wie ne grosses Natur-Lazarett
wo n är, do mache mer jedi Wett
zwoor in beschter Absicht vo A bis Zett
ohni wyter z dängge – so gschaffe hett
Und rollt denn die Blastiggwälle drhäär
no isch's fyr dr ainzelni wirgglig schwäär
und jede findet au gly, dass äär
an däm jo schliesslig nit schuldig wäär
Und leens die Grosse no so grache
im Glaine gitts aber doch e baar Sache
wo Du ellai kasch besser mache
Nimm nur emoole d'Telefonie
wie schnäll isch do e Mode verby
muess es alpott s neyschti Kischtl sy ?
ok, aber wenn scho umsverworgge
miesst hald jede sy Blastigg grad sälber entsorge !
oder – das wär doch s ganz Normale:
aifach fyr d Entsorgig – zaale !
Denn lueget d Kinderspylzyy aa
muess me wirgglig alles in Blastigg haa ?
und au wenn mer emool am Blastigghuffe
im Meer uff unserer Wält versuffe
ai glains Ziel sotte mer glaub grad no schaffe:
aimool e Wiehnacht – ohni Blastiggwaffe !!

D Ladäärneusstellig isch vom Määntignacht, em 15.Februar, bis am Mittwuch-
demoorge, em 17. Februar, uff em Minschterplatz. Mir fraien is uff lire Bsuech.